

CARTA DE VALORS DE L'ASSEMBLADA OCCITANA *occitan lengadocian*

L'Assemblada Occitana es una associacion que vòl far ligam entre los actors que trabalhan per auidar la vida occitana e mai vòl èsser un ostal comun per aquel mond. Ja que vòl recaptar las valors que se pòdon exprimir dins aquel teissut de vida puslèu qu'afortir las que li serián pròprias, l'Assemblada Occitana s'empara sus un sòcle minim de valors partejadas.

I - **Respècte de la persona umana.** L'Assemblada Occitana es pas compatible amb las ideologias que nègan lo prètz universal de la vida umana. Tota pensada, tot voler o tot fach de discriminacion, de negacion dels dreches umans, de racisme, de misoginia e d'omofobia non pòran pas brica èsser tolerats per l'Assemblada Occitana. Ja deuràn èsser extremats en defòra de l'associacion.

II - **Defensa de la libertat e de la democracia.** L'Assemblada Occitana es estacada de fons als principis dels dreches collectius, a l'ideal democratic e a las libertats individualas e fundamentalas de la persona umana. Nada entrava a aquelas valors non serà pas tolerada dins l'associacion.

III - **Reconeissença d'una realitat occitana.** L'Assemblada Occitana es una associacion en lenga occitana per l'espelida de l'occitanitat (los trachs lingüistics, culturals o politics que pertòcan l'occitan). Los que nègan o desconeiisson l'existéncia d'aquela occitanitat non trobaràn pas en l'Assemblada Occitana un ostal. E mai, ja que l'Assemblada Occitana recapta mai d'una concepcion de l'occitanitat, ela i vei un subjècte politic. E aquel engatjament politic es assumit per l'Assemblada Occitana.

IV - **Esperit de consens.** La pluralitat de sicaps e d'opinions, de còps las bregas, son lo jòc normal d'un movement coma l'occitanisme e l'Assemblada Occitana o vòl pas negar. Totun, l'amira de l'Assemblada Occitana es d'ajudar al trabalh comun e a la convergéncia dels actors en favor de l'occitanitat. Per tant, es pas un luòc ont calga agusar de diferéncias d'opinions mas un luòc de recèrca de consens. Non s'espèra pas que los actors qu'intran dins l'Assemblada Occitana sián d'acòrdi amb tot e amb totes los autres sòcis, sonque que respècten l'Assemblada Occitana coma escasença de s'encontrar e d'aprestar de projectes comuns.

V - **Dobertura.** L'Assemblada Occitana vòl aculhir de mond d'originas diferentas e de còps tractar amb de gents estrangieras a l'occitanisme. Tolerància intèrna e pedagogia extèrna, si que son de valors nòstras.

VI - **Lo voler.** L'Assemblada Occitana vòl recaptar primièr d'actors de l'occitanitat —mas se substituís pas a aqueles actors— e espia cap a l'accion. La fam d'obrar per la vida occitana es l'arsec que nos incita. Tot sòci de l'Assemblada Occitana participa als enjòcs de societat segon las siás capacitats e promòu tostemps las valors de l'occitanisme.

VII - **Actitud.** Tot sòci de l'Assemblada Occitana se compòrta d'un biais respectuós e s'absten de tot acte immoral.

En signant aquesta carta, ieu sossignat/ada, _____
(nom d'ostal, prenom) m'engatgi a n'aplicar lo contengut. E soi conscient/a qu'en cas de non-respècte de la carta, me pòdon prepausar de mesuras correctivas e pòdi far l'objècte d'una exclusion de l'Assemblada Occitana.

Luòc:

Data:

Signatura: